

20 AUG 1997

PERDANA MENTERI CHINA LAWAT MALAYSIA MULAI ESOK

KUALA LUMPUR, 20 Ogos (Bernama) -- Perdana Menteri Republik Rakyat China Li Peng akan tiba di sini esok untuk memulakan lawatan rasmi empat hari ke negara ini.

Selama berada di sini, Li Peng dijangka menemui rakan sejawatannya Datuk Seri Dr Mahathir Mohamad dan mengadap Yang di-Pertuan Agong Tuanku Ja'afar.

Esok, Li Peng dan isterinya Zhu Lin, akan diberi sambutan rasmi di perkarangan Parlimen dan pada sebelah malamnya, diraikan pada majlis makan rasmi di Sri Perdana.

Pada Jumaat, Perdana Menteri China itu antara lain akan menyampaikan ucapan di Hotel Nikko, menerima kunjungan hormat Timbalan Perdana Menteri Datuk Seri Anwar Ibrahim, mengadakan perbincangan dengan Dr Mahathir di Jabatan Perdana Menteri dan mengadap Tuanku Ja'afar di Istana Negara.

Pada Sabtu, Li Peng dan isteri akan berlepas ke Pulau Pinang untuk lawatan dua hari ke negeri itu. Di sana, beliau dijangka melawat Perbadanan Pembangunan Pulau Pinang, projek Ampangan Teluk Bahang, Taman Rama-Rama serta diraikan oleh kerajaan negeri dalam majlis makan malam.

Pemimpin itu akan mengakhiri lawatannya ke negara ini pada hari Ahad.

Kali terakhir Li Peng melawat Malaysia ialah pada Disember 1990.

-- BERNAMA

RAZ AHH